



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**37. Kalenderwoche – ab 13. September 2009**

## Schiggsahl

Es dud ja viele Leide gähm, die schon immor gesachd ham, dass alles Schiggsahl is - von ohm beschdimmd! Also, von ganz ohm beschdimmd un fesdgeleeschd - so geddlisch!

Seim Schiggsahl dud mor nisch endgehn, ham die immor gesachd. Un isch hab das eischendlich nie rischdisch gloom wolln. Viele Jahre hab isch so gedachd, dass das Schbinnorei is - Schiggsahl! Dor Mänsch - also, Sie genauso wie isch un meine Gudste - mir sinn nisch irschendeim Godd ausgelieford, hab isch gedachd. Mir kenn selbor beschdimm. Ooch so, was so los is in dor Gesellschaftd - isch hab immor gedachd, dass das de Leide een Einfluss droff ham. Ehm dursch Bolledigg un dursch Enggaschemang... - odor wie das heeßd, wemmor sisch iborall neinhäng dud. Wemmor midmachd! Genau! Dass mor sozusachn e bißl eene Freiheit had, wie mor sei Lähm geschaldn dud. Es hieß ja ooch ma - machs nach, machs mid, machs bessor!

Isch dachde werglich, dass das was bring dud - midmachn. Mor muss ehm bloß schlaue genuch sein un e bißl offbassn, wo dor Wind hährwehn dud - hab isch gedachd.

Abor nu in de ledzdn Jahre... je mähr isch sozusachn in de Freiheit neingewachsn bin, desdo mähr habsch das Gefiehl, dass isch dor Freiheit dodahl ausgelieford bin. Ja, nähmlisch dähr Freiheit von die annorn, die mid ihror Freiheit alle annorn Freiheitn beschdimm dun. Wenn isch was will, was nisch in de Freiheit von die neinbassn dud, da kann isch Kobbschdand machn un midm Arsch Flieschn fang... - die dun mid ihror Freiheit mei Schiggsahl beschdimm. Ja, die sinn so frei!

Währ die nun sinn, de mei Schiggsahl beschdimm dun, das is ganz schwähr rauszukrischn. Das is

ehm nisch bloß dor Aggormann von dor Deudschn Bank odor irschend e Bundesganzlor odor irschend e mäschtischor Scheisch... - nee, das sinn mährere, die sich unnormandor ooch nisch kenn.

Das is ja dähr Misd. Wenn das so e kleenor geheimor Glubb sein däde, von alde reische Männor, die unsor Schiggsahl beschdimm dun, dann kennedesde ma eene Bombe nemm un die allesamd in de Lufd jachn! Abor das is ehm annersch. Das dud so fungdsjoniern wie de Ausbreidung von de Migg. Wenn genuch feischde Simbfe da sinn un das Friejjahr is nisch zu gald, dann gibbds eene Miggblache. Un dann kannsd du nischd machen. Die biesagn disch, bisse sisch vollgesauchd hamm mid deem Blut. Das is dann ooch Schiggsahl.

Guhd, wenn isch un meine Gudste, wenn mir uns vornemm dun, dass mir schdadds Bier am Amd ma e Gläsl Wein drinkn wolln, dann kenn mir das selbor beschdimm. Abor wie lange mir das Geld vordien kenn, fiehr das Gläsl Wein... - da ham mir keen Einfluss droff. Un wenn ehm de Benkor Scheiße baun, dann badn mir das alle aus. Un wenn de Mexigahnor de Schweinegribbe in de Weld sedzn dun, dann missn mir eenes Daaches ooch niesn un hamm Husdnanfälle. Bei die wischdischn Sachn kannsde nischd machn. Da kannsde bloß guggn un schdaun! Un dass de so ausgelieford bisd, deem Schiggsahl, das hab isch werglich bis vor kirzlich nisch gloom wolln!

**Eduard Sachsenmeyer**